

Na osnovu čl. 23. i 55. Statuta općine Ilijaš – prečišćeni tekst ("Službene novine Kantona Sarajevo", broj: 20/09) i člana 3. Odluke o stipendiranju učenika i studenata u stanju socijalne potrebe ("Službene novine Kantona Sarajevo", broj: 33/09) Općinsko vijeće Ilijaš, na 14. redovnoj sjednici održanoj 29. decembra 2009. godine, donijelo je

**PRAVILNIK**  
**O STIPENDIRANJU UČENIKA I STUDENATA**  
**U STANJU SOCIJALNE POTREBE**

**I – OPĆE ODREDBE**

**Član 1.**

Ovim Pravilnikom utvrđuju se osnove, način, kriteriji i postupak za ostvarivanje prava na dodjelu općinske stipendije učenicima u srednjoškolskom obrazovanju i studentima u visokoškolskom obrazovanju, koji su u stanju socijalne potrebe i koji imaju prebivalište na području općine Ilijaš duže od 3 godine. Prebivalište kraće od 3 godine mogu imati učenici i studenti, ukoliko su oni ili njihovi roditelji imali prebivalište na području općine Ilijaš do 06. aprila 1992.godine, kao i oni podnosioci zahtjeva koji u vrijeme podnošenja zahtjeva imaju prebivalište i vlastiti stambeni objekat na području općine Ilijaš, a redovno se školuju u srednjim i visokoškolskim obrazovnim ustanovama u Bosni i Hercegovini.

**Član 2.**

Pod učenicima i studentima u stanju socijalne potrebe, u smislu ovog Pravilnika podrazumijevaju se:

- lica koja nemaju izvor prihoda, odnosno da primanja po članu porodice nisu veća od 120,00KM;
- da nisu članovi domaćinstva u kojima neko od članova izdaje pod zakup nekretnine;
- da nisu članovi domaćinstva u kojem je jedan od članova vlasnik putničkog automobila ili drugog motornog vozila, izuzev lica koja, u skladu sa Zakonom o carinskoj politici mogu ostvariti pravo na oslobađanje carine pri uvozu putničkog ili drugog automobila kao ortopedskog ili drugog pomagala.

**Član 3.**

Općinsko vijeće na prijedlog Općinskog načelnika donosi Plan stipendiranja učenika u srednjim školama i studenata u visokoškolskim ustanovama koji su u stanju socijalne potrebe, za svaku školsku godinu, a u skladu sa sredstvima obezbjeđenim u Budžetu općine Ilijaš.

Općinski načelnik može vršiti korekciju donešenog Plana stipendiranja do 10% u odnosu na ukupan broj planiranih stipendija.

**Član 4.**

O stipendiranju učenika i studenata iz člana 1. ovog Pravilnika staraju se Služba za društvene djelatnosti i Služba za privredu, finansije i investicije općine Ilijaš.

Služba za društvene djelatnosti će:

- zaprimati prijave na Konkurs;
- obezbijediti potrebne uslove za rad Komisije za provođenje Konkursa;
- po završetku Konkursa i izboru kandidata po odluci Općinskog načelnika, nastaviti sve dalje aktivnosti vezane za sprovođenje odluke o izboru;
- pratiti realizaciju zaključenih pojedinačnih Ugovora o stipendiranju.

Služba za privredu, finansije i investicije će

- vršiti doznaku sredstava stipendistima putem ovlaštene poslovne banke

## **II – SREDSTVA**

### **Član 5.**

Po utvrđenim i odobrenim godišnjim sredstvima u budžetu Općine Ilijaš za stipendiranje učenika i studenata iz člana 1. Pravilnika, ukupna sredstva se procentualno dodjeljuju za:

- redovno školovanje učenika u srednjem obrazovanju.....40%
- redovno školovanje studenata na visokoškolskim ustanovama.....60%

Raspodjela sredstava može, po potrebi, biti i drugačija, u zavisnosti od broja prijavljenih kandidata za dodjelu stipendija za pojedine vrste školovanja.

## **III – IZBOR KANDIDATA**

### **Član 6.**

Izbor kandidata za stipendiranje vrši se na osnovu prijave na Konkurs. Općinski načelnik raspisuje Konkurs i imenuje Komisiju za provođenje Konkursa.

Konkurs sadrži:

- uslove i kriterije koje kandidati moraju ispunjavati;
- broj kandidata koji se stipendiraju;
- broj mjeseci na koje se stipendija odnosi i njen mjesečni iznos;
- rok za podnošenje prijave;
- potrebne isprave koje se prilažu uz prijavu na konkurs;
- adresu ili druge podatke ( fax, e-mail ) na koju se prijava na konkurs može podnijeti i
- druge eventualno potrebne podatke.

Konkurs se objavljuje u dnevnom listu koji izlazi na području Kantona Sarajevo, zvaničnoj web stranici i oglasnoj ploči općine Ilijaš, najkasnije do 30.novembra tekuće godine.

Rok za podnošenje prijave na Konkurs za dodjelu stipendije iznosi 15 (petnaest) dana od dana objavljivanja Konkursa u sredstvima javnog informisanja.

### **Član 7.**

Izbor kandidata vrši Općinski načelnik na osnovu prijedloga Komisije za provođenje Konkursa (u daljem tekstu: Komisija) , u skladu sa kriterijima utvrđenim ovim Pravilnikom, o čemu informiše Općinsko vijeće.

Komisiju za provođenje Konkursa posebnim Rješenjem imenuje Općinski načelnik.

U sastav Komisije imenuju se: 3 predstavnika Općinskog vijeća Ilijaš, 1 predstavnik Službe za društvene djelatnosti općine Ilijaš i 1 predstavnik Službe za socijalnu zaštitu i raseljena lica općine Ilijaš. Na prvoj sjednici Komisije članovi Komisije će izabrati predsjednika Komisije.

Članovi Komisije neće dobivati novčanu naknadu za svoj rad.

Svaki učesnik u konkursu mora biti pismeno obavješten o rezultatima izbora, najkasnije u roku od 15 dana od dana izbora.

Spisak svih izabranih kandidata za stipendiranje objavljuje se na oglasnoj ploči općine Ilijaš.

Odluka Općinskog načelnika o izboru kandidata za stipendiranje je konačna.

### **Član 8.**

U svom radu Komisija za provođenje Konkursa ima sljedeće nadležnosti:

- donošenje Poslovnika o radu Komisije;
- razmatranje zahtjeva za dodjelu stipendija;
- predlaganje rang liste odabranih kandidata Općinskom načelniku;
- po potrebi, preciznije definisanje prioriteta za dodjelu stipendija iz člana 17. ovog Pravilnika.

Predsjednik Komisije imenuje sekretara Komisije za provođenje Konkursa koji za potrebe Komisije obavlja administrativno – tehničke poslove.

### **Član 9.**

Pravo učešća na Konkursu imaju učenici i studenti u stanju socijalne potrebe, koji nisu obnavljali godinu, a koji su u predhodnoj školskoj godini imali uspjeh u školi, odnosno fakultetu i to:

1. učenici srednjih škola sa prosječnom ocjenom 3,50 i višom;
2. redovni studenti visokoškolskih obrazovnih ustanova sa prosječnom ocjenom 7,00 i višim, za fakultete društvenog, ekonomskog, jezičkog, muzičkog, likovnog i sportskog područja i studente prirodno-matematičkog fakulteta odsjeka biologija i geografija;
3. redovni studenti visokoškolskih obrazovnih ustanova sa prosječnom ocjenom 6,50 i višim, za studente prirodno-matematičkog fakulteta (odsjeci matematika, fizika, hemija), medicine i srodnih fakulteta (farmacija, stomatologija, veterina, visoka zdravstvena škola, i dr.) i tehničkih fakulteta.

Pravo učešća na Konkursu imaju učenici i studenti koji su ostvarili manji prosjek ocjena od traženog, a čije će se molbe razmatrati ukoliko ispunjavaju druge kriterije utvrđene ovim Pravilnikom i ukoliko ne bude prijavljen dovoljan broj kandidata koji ispunjavaju uslove iz predhodnog stava ovog člana.

### **Član 10.**

Za učenike koji se prvi put upisuju u srednju školu i studente koji se prvi put upisuju u visokoškolsku obrazovnu ustanovu, za utvrđivanje prosjeka ocjena uzet će se u razmatranje prosjek ocjena završnog razreda osnovne, odnosno prosjek ocjena završnog razreda srednje škole.

## **IV – STIPENDIRANJE**

### **Član 11.**

Stipendije se isplaćuju za jednu školsku godinu i isplaćivat će se 9 (devet) mjeseci.

### **Član 12.**

Visina mjesečne stipendije iznosi za učenike 50,00KM, a za studente 100,00 KM mjesečno.

### **Član 13.**

Stipendija se, u pravilu, ne može dodijeliti za dva ili više učenika iz iste porodice i licima koja već primaju stipendiju od nekog drugog organa, institucije ili fondacije.

Porodicu iz prethodnog stava ovog člana čine: bračni drug, djeca rođena u braku ili van braka, usvojena djeca, braća, sestre, kao i roditelji ako žive u zajedničkom domaćinstvu.

#### **Član 14.**

Prava i obaveze i druga pitanja o dodjeli i korištenju stipendije regulisati će se preciznije u međusobno zaključenom Ugovoru između odabranog stipendiste i Načelnika općine Ilijaš.

Ugovor o stipendiranju učenika ili studenta sadrži: ime i prezime učenika ili studenta, JMBG, ime i prezime roditelja (staratelja) i njegovu tačnu adresu, broj telefona, JMBG roditelja (staratelja), naziv škole i međusobna prava i obaveze učenika ili studenta i Općine Ilijaš.

Ugovor o stipendiranju potpisuju roditelj (staratelj) učenika, odnosno student s jedne strane i Općinski načelnik s druge strane.

#### **Član 15.**

Stipendije su nepovratne ukoliko stipendisti redovno ispunjavaju svoje školske obaveze.

Roditelj (staratelj) učenika i student koji je potpisnik Ugovora o stipendiranju dužan je da vrati sav iznos sredstava, uz pripadajuću zakonsku kamatu, u roku od godinu dana, koje je primio za stipendiranje po osnovu ovog Pravilnika u slučaju ako napusti redovno školovanje ili ako izgubi pravo na dalje školovanje iz neopravdanih razloga.

Načelnik općine Ilijaš će putem Službe za društvene djelatnosti i Službe za privredu, finansije i investicije, obezbijediti kontrolu sprovođenja odredbi Ugovora i po potrebi pokretati postupke za raskid Ugovora i nadoknadu sredstava.

#### **Član 16.**

Načelnik općine Ilijaš ima pravo da obustavi isplatu stipendije shodno uslovima po osnovu Pravilnika i u slučaju nedostatka finansijskih sredstava u budžetu Općine Ilijaš planiranih za ovu namjenu, o čemu će korisnici stipendija biti pismeno obavješteni.

### **V – KRITERIJI ZA DODJELU STIPENDIJA**

#### **Član 17.**

Komisija će u razmatranju pristiglih molbi za dodjelu stipendija utvrđivati broj bodova za svakog kandidata prema sljedećim kriterijima:

#### **1. Bodovi po osnovu rezultata u učenju**

- za učenike prvog razreda srednje škole prosječna ocjena u osmom razredu osnovne škole zaokružena na jednu decimalu i pomnožena sa 10

prosječna ocjena x 10 bodova

- za učenike srednjih škola prosječna ocjena u predhodnoj školskoj godini zaokružena na jednu decimalu i pomnožena sa 10

prosječna ocjena x 10 bodova

- za studente na prvoj godini studija prosječna ocjena u 4-tom razredu srednje škole zaokružena na jednu decimalu i pomnožena sa 20

prosječna ocjena x 20 bodova

- za studente viših godina studija prosječna ocjena u predhodnoj godini studija zaokružena na jednu decimalu i pomnožena sa 10

prosječna ocjena x 10 bodova

## **2. Bodovi po osnovu otežanih uslova života koji su nastali kao posljedica agresije**

- učenik ili student bez jednog roditelja koji je poginuo kao pripadnik Oružanih snaga Bosne i Hercegovine.....10 bodova
- učenik ili student bez oba roditelja koji su poginuli kao pripadnici oružanih snaga Bosne i Hercegovine.....15 bodova
- učenik ili student čiji je roditelj RVI sa invaliditetom preko 80%.....10 bodova
- učenik ili student čiji je roditelj RVI sa invaliditetom od 60 do 80%.....8 bodova
- učenik ili student za svakog člana porodičnog domaćinstva koji je RVI preko 50%.....2 boda
- učenik ili student za svaki puni mjesec učešća u Oružanim snagama ili za svaki puni mjesec učešća roditelja u Oružanim snagama Bosne i Hercegovine .....1 bod

## **3. Bodovi po osnovu niskog porodičnog standarda**

- učenik ili student čija porodica prima socijalnu pomoć ili bez ikakvih prihoda.....15 bodova
- učenik ili student za svakog nezaposlenog punoljetnog člana porodičnog domaćinstva.....5 bodova

## **4. Bodovi po ostalim osnovama (teška oboljenja, broj članova porodičnog domaćinstva na redovnom školovanju, umrli pripadnici oružanih snaga)**

- učenik ili student za svakog teško oboljelog člana porodičnog domaćinstva, a koji nije bodovan po osnovu ratne vojne invalidnosti.....2 boda
- učenik ili student za svakog člana porodičnog domaćinstva na redovnom školovanju.....5 bodova
- učenik ili student bez jednog roditelja koji je umro nakon agresije, a u toku agresije je bio pripadnik Oružanih snaga Bosne i Hercegovine.....5 bodova
- učenik ili student bez oba roditelja koji su umrli nakon agresije, a u toku agresije su bili pripadnici Oružanih snaga Bosne i Hercegovini.....10 bodova

## **5. Bodovi po osnovu otežanih uslova života**

- učenik ili student bez jednog roditelja..... 4 boda
- učenik ili student bez oba roditelja ..... 8 bodova."

Prijavljeni kandidati se boduju po svih pet navedenih osnova.

Na osnovu utvrđenog broja bodova za svakog pojedinačnog kandidata, Komisija će utvrditi rang listu i predložiti je Općinskom načelniku, koji će donijeti konačnu odluku po kojoj će se dodjeliti odobreni planirani broj stipendija.

#### **Član 18.**

Kada prijavljeni kandidati pri bodovanju imaju isti broj bodova, prednost će imati kandidati viših razreda odnosno godina studija, a čiji je porodični standard niži.

### **VI – ZAVRŠNE I PRIJELAZNE ODREDBE**

#### **Član 19.**

U prvoj godini primjene Pravilnika o stipendiranju učenika i studenata u stanju socijalne potrebe, stipendije za školsku 2009/2010.godinu mogu se dodjeljivati za narednih 5 (pet) mjeseci od dana stupanja Pravilnika na snagu.

#### **Član 20.**

Ovaj Pravilnik stupa na snagu danom objavljivanja u "Službenim novinama Kantona Sarajevo".

Broj:01/1-02-1541-8/09  
Ilijaš,29.12.2009.godine

Predsjedavajući  
Općinskog vijeća Ilijaš

---

Petar Ilić